

Inatsisartut suleriaasiat § 37 immikkoortoq 1 naapertorlugu matumuuna Naalakkersuisunut apeqqutit imaattut saqqummiuppakka:

- 1. Ilaqutariinnermut Inatsisinullu atortitsinnermut Naalakkersuisup, ataasinngormat Katuami Naalakkersuisooqatigiit innuttaasunik ataatsimiititsineranni, innarluutillit pillugit suliniuteqarnini suliniutaasullu annertuut Sisimiuniinnaq tamarmik pilersinneqartussat annertoorujussuusut oqaatigai. Soorlu aamma IPIS-ip Innarluutillit Pillugit Iisimasaqarfik Siunnersuisarfiutigisup, ukiuni arlalinni illoqarfiup pingaarnersaani Nuummi Namminersorlutik Oqartussanit ineriartortinneqarsimasup, aamma Sisimiunut nuunneqarnissaa oqaatigigaa. Suliat taamaattut taamaallaat Naalakkersuisutigoortumik suliarineqarsimanerpat?**
- 2. Pilersaarutaasut pillugit Ilaqutariinnermut ataatsimiititaliaq imaluunniit Aningaasaqarnermut ataatsimiititaliaq ilisimatinneqarsimava?**
- 3. Taamaattoqarsimappat qanga ataatsimiititaliaq ilisimatinneqarpa?**
- 4. Qeqqata kommuniani kommunalbestyrelsimi ilaasortat aamma Maniitsumeersunit arlalinnit ilaasortaaffigineqartoq qanormitaava saqqummiiffigineqarsimava?**
- 5. Naalakkersuisumit ataatsimeeqatigineqarsimanerlutik?**
- 6. Naalakkersuisooqatigiinni anguniagaavoq sineriammut suliffeqarfinnik siammarsaanissaq, ukiuni kingullerni illoqarfiit missukutaasimasut qaffassarneqarnissaat eqqarsaatigineqarlutik, naak, tamanna malinneqarnianninnerami?**
- 7. Taavami ukiuni kingullerni illoqarfiit nunaqarfiillu sinerissamiittut ineriartornissaannik missukutaasimangaartut Naalakkersuisunit sunik allanik pilersitsivigissallugit eqqarsaatersuuteqarfigaasigit?**

(Ruth Heilmann, Siumut)

Tunngavilersuut

Taamatut Naalakkersuisooqatigiit innuttaasunik ataatsimiititsineranni Katuami ilisimatinneqarneq tupaallaatigeqigakku ugguunakkut apeqqutigisariaqarpara. Tassami Naalakkersuisooqatigiit anguniagaanut ilumut tassuunakkut naapertuuttoqarnerseq apeqqusertariaqarmat, isumalluarnikuugattami maannakkulli illoqarfiit allat ineriartortinneqarnissaminnut ukiuni kingullerni missukutaasut kiisami isumagineqartussanngormata nuannaqigatta. Ilemi suliffipassuit ukiuni kingullerni Sisimiunut nussorneqarnikummata, Maniitsoq suerulluinnarlugu.

Soorlu aamma Maniitsoq tassaammat innarluutilinnut sullissinermi ukiorpassuanngortuni siutuusoq misilittagaqarluartuusorlu, soorunami aamma Paamiut, Qaqortoq, Ilulissat, Aasiaat allallu tassani aamma ilaapput, tamakkua tamaasa eqqarsaatigalugit nalilersueqqaarneq ingerlanneqarsimanerluni, aammalu nalilersuinermi kikkunuku tunuliaqutaasimasut paaserusuppakka.

Naak, Siumumi ilaasortaagaluarlunga arajutsiinnarsimanerpakka, aammami Ilaqutariinnermut ataatsimiititaliami ilaasortaanninnama. Ilaqutariinnermut Naalackersuisumit suliniutit taamaattut qanoq siuarsimatiginersut paasisaqarfigerusuppakka, tamatumuunakkullu Naalackersuisup nassuiaateqarnissaa kissaatigalugu.

Taamatut innarluutilinnik sullissineq siunissami illoqarfimmut Sisimiunuinnaq tutsillugu agguaqatigiinngitsumillu ingerlanneqassaguni pissusissamisoortutut isiginnginnakku, taamatut apeqquteqarpunga.

Apeqquteqaatikka ullut suliffiusut qulit qaangiutsinnangit akineqarnissaat piumasarivara.